

2475

國朝詞綜

冊五



國朝詞綜卷三十一

青浦王昶纂

江昉三十七首

沈大成三首

江

昉

字旭東號橙里又號硯農歙縣人寓居揚

州候選知府有練溪漁唱三卷集山中白

雲詞一卷

沈沃田云橙里少嗜倚聲饒有清致劇鉅
肝腎磨濯心志蓋幾幾乎追南渡之作者
而與之並雖自汰甚嚴所存不啻半珠一
粟而其苦心孤詣善學古人審音者固望
而可知也練溪在歙之北鄉江氏世居于
此故以名其詞云 淮海英靈集云橙里
意境清遠慕姜白石張叔夏之風其詞清
空蘊藉無繁麗昵褻之情除激昂踔蹶之
習可謂卓然名家

柳梢青

風約簾衣嫩寒生悄愁鎖眉低何處閒尋春懷如夢
悞了鐙期 冷烟芳草淒迷殘照裏鶯聲亂啼最是
銷魂綠楊隄畔紅板橋西

八聲甘州懷黃夢珠漢上

悵花前兩度換東風虛負翫花辰記青尊邀月紅闌
譜字白雪吟春共數同心晨夕委歛拂芳塵一別渾
如雨那不思君最是臨高遠溯望空波淼淼烟暗
遙津對西窗無緒啼鴉訴黃昏想江城落梅飄處算
幾番飛夢入湘雲銷凝久憶年時事獨掩重門

疎影淨暉亭賦竹影

蕭騷滿壁訝雙身个个如許欹側一樣清圓移過闌
干青鳳林中飛出幾枝劃破苔茵冷瘦盡了夕陽疎
密是誰模露葉烟姿活脫墨痕狼藉夢託瀟湘遠
岸虛沙淠月處斑淚偷滴搖漾無聲一任風篩依約
翠侵簾隙迷濛十畝秋陰裏更悄浸漪漪寒碧最夜
闌雲掩晴輝獨向小階難覓

木蘭花慢秋帆和厲丈樊榭

近蒹葭野岸展十幅挂檣竿慣遙障隄痕低遮鷺浴
高拂雲寒爭先驚飛雁底帶蕭蕭落葉下江干悵悵
登樓望眼幾番張盡涼天悠然波靜遠如閒宛轉
度楓灣指一片斜陽參差影裏回首鄉關空懸離愁
渺渺任西風送客自年年畫出瀟湘數點依稀沒入
蒼烟

高陽臺贈素蘭席間賦

乍茁瑤房初調玉軫冰裾淨浣纖塵雅不成嬌飄飄
翠帶輕分曲闌響佩東風外似飛來空谷香雲兩眉
尖瘦鞦韆春山澹掃秋痕洞花幽草羞窺面愛生來
靜婉不惹遊氛試捲晶簾娟娟涼月宜人十千斗酒
通宵醉解金貂誰換溫存趁苔階嫩綠纔鋪暗蹙湘
裊

玉漏遲

伊人秋水遠相思迢遞茂陵心眼悄對釭花獨自覺
難消遣枝上紅稀翠暗蝶夢繞梨雲秋苑愁莫翦花
陰月冷錦箏彈怨舊時曳雪歌雲悵三疊陽關一
聲河滿似草春懷又被東風吹徧書劍天涯去後何
處覓試香庭院簾半捲怕聽杏梁雙燕

一萼紅

秋日招諸吟侶蜀岡野眺薄暮放舟紅
橋入北關由小秦淮就岸各賦一闋書

事

一枝藤點蒼蒼葉路塵夢恰教醒山翠迎人松聲送
響苔級如喚先登蘆漪外涼花颺雪好襟懷瀟灑落
寒汀水寺疎鐘平林棲鳥烟冷秋屏載取夕陽歸
去任咿啞柔艣搖碎青萍風渚蓮裳露隄蓉面誰憐
柳髮星星驀然驚木樨剛放可憐人香裏化飛英回

望樓痕幾曲杜牧三生

風入松沈沃田步履尋幽圖

輕衫戀體稱閒尋緩步過前林白雲不埽橫眠懶罨
晴天一片疎陰犖確斜穿曲徑碧空澹抹遙岑長
風涼灑動松吟雅韻寫秋琴流泉浣斷塵飛處笑人
間何事關心影帶夕陽歸去知君更住幽深

淒涼犯秋草

淒迷望極平原外亂葦一片聲急長亭怨滿王孫去
後無情自碧蒼茫暮色襯殘照荒涼漸迫黯黏天遙
連塞陌隱隱間沙白回首芳堤畔慣碾香輪飛花
狼藉斜川韋曲甚青青舊時游歷昨夜新寒怕匝地
霜華乍入又西風遍野暗翦更瑟瑟

醉花陰蓼花

搖曳汀沙霜落候開遍烟江口翦碎碧天霞幾簇紅
疎鷗外斜陽漏低窺鏡裏波痕縐冷浸燕支透獨
客暗銷凝葉葉西風點點秋容瘦

玉漏遲悼吳葑田

秋來吟興悄詞人跨鶴玉簫聲杳淚灑西風恨入夕
陽衰草記昨帆回漢水歌秀句相逢一笑情正好零
宮斷羽忽傷同調無端驟雨摧殘嘆瞥眼光陰夢

驚窗曉曲逕花深那得吟魂重到欲寫琴絲怨滿又
石砌哀蛩鳴蚤愁莫掃江上亂雲縈繞

蝶戀花 蛺蝶花

綠樹陰陰春欲暮石罅闌根慣是伊開處粉翅翩翩
渾似舞隨風未許雙飛去門草人來深院午一笑
生擒錯認尋香侶夢入羅浮山下路芳魂只在花房
住

憶舊游

西磧在太湖西北南面具區余書莊在
山下門外波光萬頃浩浩淼淼不可窮
極湖中風船張六道帆任風所之朱檢
討云到得石尤風四面風船打鼓發中
流又小姑腕露金跳脫帆腳能收白浪
中是也七十二峯羅列指顧莫釐縹緲
正當樓遙峙白浮米堆雅宜諸峯翠色
接簷際山谷廻環數十里居人盡種梅
爲業山根沿水處緋桃連縣紅霞二十
里滉漾波影中垣內梅數百樹桂數十
本枇杷數十株竹數畝間以長松高梧
紫藤碧蔓清陰漲地無分春冬嘯詠間
頗得琴書幽趣偶憶及此不勝過眼烟

雲之慨爰製此詞以誌前蹤云爾

珍做宋版印

憶湖光瀉練山影堆螺瀟洒人家荷笠鋤雲外記疎
泉灌藥就地分花有時喚鶯聽水一石枕烟霞更石
壁卽湖東精舍垂綸五湖風起閒泛秋槎堪嗟屢
搔首料舊盟鷗鳥猶戀春沙俯仰浮生事好林泉誰
侶負了雲涯松間夜眠孤鶴唳月冷銜筍縱夢到巖
扉應教一片雲半遮

清平樂

曲闌間凭心事還重省花裏嫩鶯啼不定攪亂夕陽
紅影誰家翠管吹愁一庭烟草如秋欲去登樓望
遠暮雲遮斷芳洲

又

新陰滿徑月底花篩影寂寞心情憑自領小院無人
春靜海棠開到三分憐他伴我溫存始解華胥是
夢曉風吹破行雲

菩薩蠻中元夜對月

一丸孤月生光悄濕螢點點浮烟草清影散窗紗新
涼入硯花多少秋來意都在蛩聲裏幾度怯微吟
階前露又深

一枝春洋楓本小葉繁芽初發如燕支春深轉

綠海賈載來購之甚不易得因賦此闕
以記草木之殊異也

丹鳳梭翎是誰乘萬里星槎偷取迴風似舞翦碎海
天霞縷石家慢數縱七尺珊瑚輸與看最好照影扶
疎畧借夕陽低護猩紅漸無尋處到春深試驗綠
陰同賦相思葉上秋老恰難題句遙情擬託應夢杏
雲濤烟嶼還錯認玉洞初開桃花帶雨

臺城路雪徑

側寒移步支筇去紆迴暗穿林窅軟玉遮籬濕銀隱
屐踏碎梨花多少緣階正好愛疊疊勻鋪謾隨風掃
一綫光分竹間翻影漏斜照天教放晴入畫粉痕
鉤瘦綠蘭出疎草密綴苔枝圓凝凍蕊欲透先春信
蚤夜來淨皎和月色磨成恍然侵曉獨自行吟滿襟
清興悄

清平樂家冷紅上舍歸杭

怕聽檐鐵雨打黃花節況是青尊重話別酒到愁腸
先結明朝分手秋潭霜清月皎波寒搖醒蘆邊歸
夢一帆風送江南

風入松新秋集小酉藏書別館遲杉亭不至

濕雲斂盡雨初收碧宇空浮薄涼次第侵羅袂話殘

陽別館偏幽暗裏砌蛩交語晚來月暈通秋
西風吹過小紅樓敲響簾鉤新聲慢擬閒宮徵按清商一
調伊州悵望詞仙白石藕花深處勾留

憶蘿月

嘹嘹征雁蕭瑟殘蘆岸迷入暮雲孤影斷望盡倚樓
心眼屏空舊夢難成簾悽燈暗愁生幾陣梧桐夜
雨隨風攪作秋聲

一萼紅茶烟

鎖窗寒惹翩翻老鶴引頸避松關似霧遮籬疑雲展
岫依約低抹林端竹爐畔幾番候火颺縷縷清響沸
龍團穀雨晴初棟花開後小榻吟邊庭角夢回長
晝訝微陰作暝吹墮檐前蟹眼頻翻鰕鬚乍捲剛逗
銀葉香殘更一種隔紗腰褰帶蘭風散入晚春天喚
起當年桑苧共品山泉

採芳信酒旗

出林杪颺半幅輕風一竿殘照認水村山店閑愁頓
如掃紅闌綠檻香醪字慣引嬉春蚤胃疎籬弱柳高
牽晚烟低裊花雨續紛紛開展浮拍心情豔游懷抱
試問當鑪可有翠鬟妙憑空也學秋千影搖曳憐伊
小踏芳塵日日招來醉倒

洞仙歌

初冬招看雲春橋杉亭寶所家玉屏集
湖上各賦一闋

湖天雲淨正小春時候一片殘陽戀疎柳漾晴瀾搖
入荒徑寒汀擊畫桡作弄蘋翻菰斂登臨纔幾日
秋去無憑猶剩黃花較人瘦簾密捲西風倒影芳尊
認隱約隔江眉秀看遠樹爭喧亂昏鴉蚤野寺烟林
半規蟾漏

清平樂

嚴灘舟中聽雪

打窗盈耳騷屑風聲裏寂寞青燈人獨倚雲外夜寒
鴻起天涯身在孤篷剡溪有夢潛通最是清吟未
了曉看玉琢千峯

齊天樂

秋水

浸空愁已隨流杳西風驀然吹轉乍沒蘆磯還平蓼
渚攪得殘陽都亂寒光片片怪誰把并刀夜來都翦
驚起眠鷗和雲掠去楚天遠眉痕最憐淡掃正菱
銅淨拭消瘦難掩遙念伊人寄緘雙鯉尺素休教輕
濺彎環斷岸又一葉浮紅頓成悽怨記載盈盈隔花
催桺暖

點絳脣

雀舫烟篷載詩嬾向旗亭醉高樓獨倚落葉西風裏

滿耳秋聲攪亂愁人意涼如水碧天鴻起明月空
千里

綺羅香 欄

詰曲圍春玲瓏界月亞字形分十二玉樹雲廊常伴
簾衣垂地夾畫舫六柱中開籠紺塔七層空際又誰
家小徑初晴有人繡罷倦頻倚前宵偷按樂府記
得低揚試拍釵聲敲碎不礙看花祇隔染裙湘水風
惻惻嫌爾侵涼酒懣懣賴伊扶醉正庭邊紅藥翻時
斷香飄暗裏

又 簾

細擘湘痕淺絙吳帶滿軸織成纖軟幾日春寒垂到
試燈深院眼潛通瀲灩雙波愁隔斷玲瓏千片晝沉
沉金鴨香溫不教裊裊篆痕散翻翻來去紫額欲
向蘭閨喚喚夢爭窺人面報道花開一笑風前齊捲縱
玉葱早起高懸怕銀蒜夜還低腕待量來百斛明珠
倩誰穿繡綫

買陂塘 蘆

一枝枝荒江送響記曾搖過烟艇雪花點點偏侵鬢
飄泊斷篷殘梗看弄影更瑟瑟蕭蕭攪亂斜陽冷空
波萬頃慣曳轉西風捎來疎雨引領入詩境關鴻

蚤辛苦銜將路迴圓沙棲也難定月明塞管吹寒夜
多少征人愁聽驚夢醒又幾葉敲窗喚起吟秋興遙
山掩映認魚浦鷗鄉參差遮斷極目水天暝

綺羅香餘花

葉密藏香風翻漏影慢認紅英飄泊蜂蝶難窺一片
綠雲迷却賸幽姿偷綴林間驚冷艷倦舒闌角縱嬌
然怕展芳心空教悞了燕鶯約日長深院靜悄簾
外金鈴暗響猶懸朱索小朵伶俜應怨春歸寂寞弄
晴陰細雨黃梅籠近遠輕烟翠幙似多情伴我微吟
一枝和露落

玉漏遲雪珠

翦水僂人技飛霰六出飄空游戲碧落寒凝粉蕊未
花先墜釋名水下遇寒而凝寒甚則爲粒珠寒淺則
爲花粉萬顆冰丸擊瓦漸灑遍謝娘庭砌應慢擬風
前詠絮香痕彈淚待將十斛量成縱裏就鮫綃共
愁誰寄繡縷難穿空拂晶簾垂地凍合陰雲作暝更
瑟瑟敲簷聲細闌獨倚暗聽亂跳還碎

買陂塘蘋花

愛平鋪水明沙淨葉分十字偷聚風漪翠影烟如織
小樣白蓮無數花放處早鷗夢驚回幾陣橫塘雨冰

雕雪縷慣弄影邀涼吹香潤碧點點破殘暑江南
種付與蘇潭深貯託根不染塵土萼絲荇帶難相並
輸此清標幽素還認取盡翦碎秋雲點綴湖天暮輕
撓盪去載山色青青玉纖采摘和月澹遙浦

月邊嬌白燕

玉羽翩翩拂幾陣嬌寒梨花斜頂迴風軟語招涼綰
袂乍合乍離難定沉沉院宇恍認墮雕梁雲影參差
起處早一翦分開烟暝好教向夜低窺水晶簾捲
琉璃窗迴重來王謝依然門巷換了雪裾霜領香泥
舊壘也料是烏衣羞並愁侵片月隔畫闌偷映

摸魚子月夜登金山集山中白雲詞句

巖孤篷水平天遠古臺半壓琪樹石根清氣千年潤
禪外更無今古浮淨宇對此境塵消江影沉沉露停
杯問取任一路白雲烟然冰潔空翠灑衣屨凭欄
久說與霓裳莫舞此時心事良苦浦潮夜湧平沙白
落葉空江無數還自語聽虛籟泠泠無避秋聲處離
情萬緒正獨立蒼茫鳴鳴歌罷小艇載詩去

高陽臺上巳紅橋遲素蘭不至集山中白雲詞

句

花引春來山邀雲去烟波自有閒人獨立東風輕衫

厭撲游塵趁香隨粉都行遍細看來不似桃根艤孤
篷鶯柳烟隄流水中分芳心一點誰分付料因循
誤了臨水湔裙油壁相連幾回錯認梨雲妝樓何處
尋樊素望中迷花密藏春黯銷凝南浦歌闌簫鼓黃
昏

沈大成字學子號沃田金山衛人監生

高陽臺 辛巳夏雨中集榮木軒時將歸華亭卽

席話別

燭影分簾檐聲瀉瀑麗譙銀漏將沉自客蕪城年時
有幾題襟黃梅雨洗紅蘭冷卷湘簾淺酌高吟却銷
凝柳暗江頭離思難禁竹西歌吹繁華處笑杜郎
客裏常倦登臨白髮玲瓏耐他孤檠疎砧抽帆頻問
瓜洲渡肯相忘垂老同心記重來籬菊江楓雁語秋
深

水龍吟 癸未長至前五日杉亭春農耦生同集

對琴草堂因譜此闋

巷南別館清幽小簾細雨陰陰地薄綿猶御生衣未
試熟梅天氣近局相招良辰可愛褰裳同至正戎葵
開盡高梧新竹闌干外堆濃翠京維積年別久數

前游心頭眼底風吹疊鼓龍舟午鬧轉添吟意活蕈

穿莎鮮鱗透網江鄉佳味夜何其莫管嚴城柝急爲
公沉醉

疎影雨中同人集程筠榭坐雨安居

蕭蕭未歇正濕雲若夢烟水空闕門茗捶琴長日無
聊愁煞街南泥滑疎簾清簟松篁裏恍置我脩然林
樾逗層軒燕子才歸又聽數聲啼鴂難得主人好
事擘牋更洗盞爲聚裙屐彩筆橫飛晝刻初移散落
滿堂香屑謂杉亭舍人由伊捉甕傳新格已判卻井
中投轄況漳蘭開近屏風花氣晚來清絕

國朝詞綜卷三十二

青浦 王昶 纂

史承謙二十八首

諸國鈞一首

任曾貽二十三首

史承豫四首

史承謙

字位存宜興人諸生有小眠齋詞四卷

儲長源云位存以熏香摘艷之才爲滴粉
搓酥之用優游漸漬久而益專其于南渡
諸家不屑屑句摩篇倣而一種幽情逸韻
流于筆墨之外蓋能自出杼軸而又得體
裁之正者 史衍存云位存兄精于倚聲
之學自南唐兩宋迄 昭代諸名家靡不
搜采研誦吸其精英而淘洗出之高者直
軋白石梅溪次不失爲竹垞華峯諸前輩
語梁溪杜丈雲川推爲近代第一作手非
虛譽也

南歌子

月上輕羅扇涼生小畫衣玉腕又重攜曲池風不定
水螢飛

又

茜袖凝香重銀燈照影嬌人去月痕消畫堂空似水

可憐宵

百字令 令橋曉發

布帆清曉小橋頭還聽半江潮送辜負新來鴛被底
多少桂花涼夢滿袖霜華一船烟月不奈羈愁重長
卿游倦空憐琴劍孤擁因甚飄泊輕裝小長干外
日日閒飛輕粉輕烟消歇了那有翠翹釵鳳桃葉
難迎莫愁遙隔別思無端湧忽添淒怨阿誰玉笛偷
弄

瑤華慢 郊園見梅同長源賦

逼年殘景三九初交東閣還還淒寂暖光晴晝全不似
風雪來時寒色春愁預惹待重理何郎吟筆不知他
何處香來竹外一枝先得全身小映清池看蝶影
橫斜粉光如拭清姿消瘦應未許此際偷吹橫笛水
村山郭想更有千株欹側約明朝小酌休遲去訪石
亭消息

祝英臺近 碧鮮巖相傳爲祝英臺讀書處明邑

令谷蘭宗先生鑄一詞於壁秋日過

之因和原韻

楚雲歸湘珮杳芳意寄瓊箸碧蘚蒼苔曾記讀書處
未輸錦水鴛鴦花叢蛺蝶長自向春風容與便應